

A directiva, que incorpora dúas poetas, da un ultimatum para que os literatos busquen outros rexedores

Novoneyra, reelixido presidente dos escritores en lingua galega

«Que teñan preparada unha sucesión porque esta directiva non aceptará ningunha nova reelección no ano 2001». Este é un dos acordos da asemblea da Asociación de Escritores en Lingua Galega na que foi reelixido presidente Uxío Novoneyra. A entidade conta

con máis de douscentos socios. A asemblea foi informada de que a Academia Sueca comunicou á Asociación que xa tiña recibida a acreditación do escritor Xosé Luís Méndez Ferrín, «elixido co 95% dos votos a favor», como candidato a Nobel de Literatura.

A CORUÑA. RODRI GARCÍA
Redacción

Uxío Novoneyra (Parada de Moreda-O Courel, 1930) explicou que a decisión da xunta directiva está motivada polo feito de que desde 1988 vén sendo reelixida sistematicamente.

Esta vez cesou como vocal, a petición propia, o lucense Lois Diéguez e incorporáronse como vocales as poetas Marta Dacosta e Iolanda Castaño. «A liña de actuación será a mesma que se vén seguindo desde que Miguel Anxo Fernán-Vello asumiu a secretaría», explicou o presidente, quen lembrou que «fun reelixido sen presentarme no ano 1988 e aquí levo once anos. Isto xa é unha cousa insufrible».

Os asistentes á asemblea, que tivo lugar o pasado fin de semana no Museo do Pobo Galego, en Compostela, aprobaron os principais proxectos a desenvolver pola entidade nos próximos meses.


Invasión de mulleres

A inclusión de dúas rapazas na xunta directiva débese, entre outras cousas, a «unha entrada masiva das mulleres en tódolos eidos. Igual que invadiron a universidade, as mulleres invaden a poesía en galego», di Novoneyra.

En canto a presenza de moitos escritores novos, sobre todo na poesía, pensa que «cando os autores deste último tercio de século maduren é de esperar unha gran cousa. Polo de agora non aparecen os grandes nomes da xeración Nós ou da xeración dos cincuenta».

O autor de *Os eidos* destaca o feito de que «moita xente usa o galego como idioma literario» polo que «pode estar sendo un deses grandes momentos, aínda que non aparezan nomes».

En canto ó compromiso social poético, Novoneyra di que a lírica galega «sempre tendeu a ser comprometida, sempre tivo unha gran incidencia a poesía social». Recoñece que «pode vir un boom esaxerado como nos anos setenta onde todos escribían poesía social e dáballes vergoña escribir poesía amorosa».



Uxío Novoneyra presidirá a Asociación de Escritores en Lingua Galega ata o ano 2001

XURXO LOBATO

«Volvo de Compostela o Courel»

«Quero ir do Courel a Compostela por terras libradas». A frase estaba entre os poemas das *Elxías* de Novoneyra e para moitos converteuse en bandeira. Era unha época na que «esperábanse grandes cousas, esperábase a revolución mundial. Iso é increíble, ocorre moi raras veces», di o poeta. Explica que libradas tiña o sentido de liberadas e recoñece que o resultado daquela esperanza «foi bastante frustrante, pero as cousas para que empecen a ocorrer teñen que ser soñadas antes».

Uxío Novoneyra marchou a Compostela e alí vive desde 1983. Agora leva ano e medio sen ir polo Courel debido a enfermidade. Se na súa xuventude tivo que irse O Courel por motivos de saúde e alí empezou a escribir, agora é a mala saúde a que lle impide viaxar ás terras que o viron nacer. A enfermidade de agora «é un pouco máis

grave que aquela da mocidade», porque «saio dunha e métome noutra», pero «estou desexando ir». De feito, o poeta volve á montaña lucense polo camiño da literatura. No prelo ten un novo libro titulado *Ameto mítico*. «Está composto e corrixido, pero quero que saia fora do tempo destas eleccións, nun ambiente máis tranquilo», di.

«Un ir e volver»

Este novo poemario ten como subtítulo *Arrodeos e desvíos do camiño de Santiago e outras rotas*. Irá ilustrado con fotografías do coruñés Federico García Cabezón.

En canto a temática, «é un recorrer o Courel e arredores, un ir e volver. Ó final volvo de Compostela o Courel, volvo á poesía rimada, ata me atrevería a dicir de rima brillante». Novoneyra pensa que este tipo de poesía é convinte pola súa sonori-

dade xa que «é co único que contas para dar a sensacións da terra». Insiste en que «é un libro de idas e voltas, de non poder parar de viaxar ó Courel e a alta montaña luguesa. Non é escuro, nin difícil. Quizá non ten esa cousa dos *Eidos* en que a terra te cerca por tódolos lados; aquí hai unha distancia a terra, xa que un ten un dominio da linguaxe moito maior, pero non é un libro comparable con *Os Eidos*».

Este fillo de campesiños, afirma que «á terra non se lle pode oprimir o seu silencio con palabras; ó mesmo silencio nos outros só o oímos ás veces e cando o oímos xa non lle chamamos silencio».

Mentres, outros escriben da súa obra en libros como o de conversas co poeta e antropólogo ourensán Emilio Araújo ou o de Xulio Calviño, *Novoneyra e os motivos de Circe* (Espiral Maior).

Os autores elixen libro do ano «O lapis do carpinteiro»

O lapis do carpinteiro, de Manuel Rivas, foi elixido pola Asociación de Escritores en Lingua Galega como o mellor libro publicado en Galicia o ano pasado. Cada un dos socios votou á que consideraba mellor obra de tódolos xéneros literarios e o resultado final foi que a novela de Manuel Rivas acadou seis votos porque «había moitas con un voto, dous ou tres», indicou Uxío Novoneyra.

Miguel Anxo Fernán-Vello, secretario da entidade, explicou que este premio, do que esta é a primeira edición, «ten como particularidade relevante o feito de que os propios socios e socias da Asociación son os encargados, mediante votación persoal, de elixir a obra gañadora».

Támén apuntou que este galardón literario «pretende constituírse nunha referencia de gran prestixio dentro do mundo das letras galegas» e leva consigo a entrega dun obxecto artístico ó gañador.

A Asociación de Escritores en Lingua Galega formouse en 1980, sendo o seu primeiro presidente Bernardino Graña.

Entre os anos 1982 e 1985 Uxío Novoneyra ocupou a presidencia pero, aínda que dimitiu tres anos máis tarde, «no 88 fun elixido sen presentarme», lembra agora, calculando que a reelección da última asemblea xa é a sétima.